

Kerajaan tegas tak benarkan mana-mana syarikat berdaftar di Israel berada di Malaysia – PM Anwar

Astro Awani

07 Mei 2024

Firdaus Azil

PUTRAJAYA : Kerajaan sama sekali tidak akan membenarkan mana-mana syarikat yang berdaftar di Israel untuk melakukan sebarang aktiviti di negara ini, tegas Datuk Seri Anwar Ibrahim.

Bahkan, menurut Perdana Menteri, dua syarikat yang didakwa membekalkan senjata kepada rejim Zionis iaitu Lockheed Martin dan BAE System tidak berdaftar di Israel sepertimana syarikat perkapalan ZIM.

Tambah Anwar, kelulusan berhubung syarikat ZIM pula telah diperoleh sejak tahun 2002 lagi, sebelum beliau mengambil keputusan untuk membatalkan mana-mana kapal syarikat tersebut berlabuh di perairan negara ini.

“Tak ada (syarikat) yang berdaftar... kita tak benarkan. Yang benarkan (tahun) 2002 Tun (Dr) Mahathir (Mohamad) bawa (kapal) Zim. Kita dah batalkan ... ingat 2002 yang benarkan kapal Israel masuk itu adalah Tun Mahathir masa jadi Perdana Menteri. Tiada bagi alasan apa pun Kemudian diteruskan.

“Saya batalkan kepada Jemaah Menteri, itu pendirian kita (untuk) tak izinkan,” katanya ketika ditemui pemberita selepas menyempurnakan Majlis Peluncuran Strategi Pambanterasannya Rasuah Nasional (NACS) 2024 - 2028 di sini, pada Selasa.

Beliau berkata demikian sebagai mengulas gesaan bekas Perdana Menteri, Dr Mahathir agar kerajaan perlu segera mengusir dua syarikat tersebut yang kini berada di Malaysia untuk menyertai pameran Pameran Defence and Service Asia (DSA) dan NATSEC Asia 2024 di ibu negara.

Dakwa Dr Mahathir, Lockheed Martin dan BAE System merupakan pembekal senjata terbesar kepada rejim Zionis yang melakukan serangan dan pengeboman ke atas rakyat Palestin sejak 7 Oktober tahun lalu.

Dalam perkembangan sama, Menteri Pertahanan, Datuk Seri Mohamed Khaled Nordin berkata, sebagai sebuah negara perdagangan bebas, Malaysia memberi ruang kepada semua pemain industri global untuk memasarkan produk dan perkhidmatan mereka di negara ini.

Sehubungan itu, Malaysia, katanya lagi, mengambil pendekatan untuk tidak campur tangan dalam urusan perniagaan mana-mana syarikat global dengan mana-mana negara tertentu.

Menurut Khaled, DSA dan NATSEC Asia 2024 merupakan pameran yang dianjurkan oleh pihak swasta dengan kos dan perbelanjaan ditanggung sepenuhnya oleh pihak penganjur.

Jelas beliau juga, pameran ini tidak memihak atau memberi kelebihan kepada mana-mana negara atau syarikat tertentu.

"Sebaliknya, dibuka kepada semua negara dan pemain industri termasuk penyertaan besar dari negara-negara Islam seperti Republik Turki, Republik Indonesia, UAE, Iran, Bosnia dan Herzegovina serta Pakistan.

"Selain negara-negara Islam, pameran ini turut menjadi arena penting kepada pemain pertahanan Asia dari Korea Selatan, China, India dan Singapura," tambah beliau.

Kementerian Pertahanan turut menegaskan bahawa dasar perolehan pertahanan negara dilaksanakan dengan mengambil kira kemajuan teknologi mutakhir, keperluan strategik negara, kos sesuai nilai, kepentingan nasional serta pendirian politik global Malaysia.

© 2024 Astro AWANI Network Sdn. Bhd. 200001032668(535275-D) All Rights Reserved.

Source: <https://www.astroawani.com/berita-malaysia/kerajaan-tegas-tak-benarkan-manamana-syarikat-berdaftar-di-israel-berada-di-malaysia-pm-anwar-469480>